

dentibus sub sensu, mathematica autem ipsa sub sensu cadunt, & imaginationi subiacent, vt linea, figura, numerus, & huiusmodi, & ideo intellectus humanus a phantasmatibus accipiens facilius earum cognitionem accipit, & certius, quam intelligentia alicuius, vel etiam substantiæ quidditatem, potentiã, & actum, & huiusmodi; & sic patet, quod mathematicæ consideratio est facilior, & certior, quam theologica, & multo plus quam aliæ scientiæ operatiuæ-

29 Conclusio 2. physica est certior quoad nos, quam metaphysica; patet ex iam dictis, & totum ostendo cum doctrina Angelici Doctoris tertio contra gentes. cap. 29., vbi habet, quod cognitio Diuinarum rerum multum incertitudinis habet, quod demonstrat diuersitas scientiarum de diuinis eorum, qui hoc per viam demonstrationis inuenire conati sunt, quod etiam confirmo ex doctrina Rabi Moyſi, quia ad talem acquisitionē, metaphysica quatenus naturali virtute a nobis potest acquiri, requiruntur omnes scientiæ, in tanta autem multitudine demonstrationum potest contingere, quod quis accipiat pro demonstrato aliquod falsum, quod tantum aliqua probabili, vel sophistica ratione sit ostensum, ex quo fundamento Angelicus Doctor primo contra gentes capite 4. concludit sic, & ideo oportuit per viam fidei fixa certitudine ipsam veritatem de rebus diuinis hominibus exhiberi.

30 Conclusio 3. metaphysica est diuinissima & honorabilissima omnium scientiarum.

Probo conclusionem autoritate, & ratione adducta a S: Thoma, quæstiuncula 3. opusculi citati supra n. 28. vbi docet, quod sicut rationabiliter procedere attribuitur naturali scientiæ, eo quod in ipsa obseruatur maximus modus rationis, ita intellectualiter procedere attribuitur diuinæ scientiæ, eo quod in ipsa obseruatur maxime modus intellectus; differt autem ratio ab intellectu sicut multitudo ab vnitatem. quare Boetius 4. de consolatione ait, quod similiter se habet ratio ad intellectum sicut tempus ad æternitatem, & circulus ad centrum, est namque proprium rationis circa multa diffundi & ex eis vnam simplicem cognitionem colligere: quapropter in hac re reflectendo D. Dionysius cap. 7. de diuinis nominibus dixit, quod anima secundum quod habet rationabilitatem diffusiuè circumuenit veritatem, & in hoc differt ab Angelis, sed in quantum multa conciliat ad vnum, quodammodo sequitur Angelos; intellectus autem